

皇清文穎續編

皇清文穎續編卷五十二

詩

樂府

平定準噶爾雅四篇

謹序

李因培

臣伏見

皇上撫御萬邦溥海內外悉主悉臣恩德鴻龐聲教遐暨幅員之廣超越前古至於武功固所不廢然非乘時觀變

神謀獨斷破羣疑秉

廟算則數世逋誅之寇未易廓清故自古虜公之奏
未有不天造神斷而成大事者也謹按準噶爾
爲元時別部瓦剌之後其先世額參及子託渾
逃竄西北分爲四部一曰都爾伯特一曰青海
一曰北額魯特一曰套爨並屬顧實汗內附奎
噶爾丹強盛兼并吞噬蠶食與國今其所部亦
非舊矣我

朝百餘年來恩覃威赫

聖祖

世宗聖聖相承撫茲遐荒以生以殺罔敢不冀而其
餘孽未殄自相荼毒

皇上憫其內亂納其降人命將推誠知人善任遂收
其部衆抵巢穴而底定焉大師所至夾道壺漿
兵無血刃之勞人有更生之樂凱奏之日典禮

告備喬喬皇皇抑何盛也

臣仰窺

聖烈親見大功之成愧無鴻筆雍容揄揚歌詠其盛
事竊喜西域部落悉底蕩平山川道里盡歸版
圖卽依所部之數釐爲四篇曰平西陲雅雖畧
仿尹吉甫召穆公及柳宗元諸體製至於豐功
駿烈固非周唐諸君所能比較於萬一蓋智勇
天錫而獨悲之以

睿斷

聖德卓越千古僅見也遂不辭譴薄謹呈

聖覽冀以紀一代之偉績

臣

因培誠惶誠恐稽首頓

首謹言

皇風納降也都爾伯特爲厄魯特四部之一首先來
歸成功之始也

蕩蕩皇風萬方來同蠢爾四部蚩駘相從孰離其族
叩關來通

帝命納之閔其內訌

一章

維彼不庭蠻觸是鬪弱肉強食脅其左右自作弗靖

猷

后來蘇願籌前箸願効前驅

二章

興州之邦山莊之陽蛾拜扶服魚頡爲盼睢盱伊嘼

慙彼痛創爰宅爾宅周索是疆

三章

如燠斯寒賜以衣冠如飢得哺賜以粥餐匪鹽諸利

實謀其安奔走偕來樂覆幬之寬

四章

歸命孔多虜在我目拊背搯吭按其山谷審其虛實

瞭無攸伏

帝曰往哉咨爾岳牧

五章

岳牧謀僉武嬉文恬臆決唱聲並爲一談

帝申乾斷肯受其亂奮厥雄圖稟余成算

六章

昔在

先朝賊固其巢六師移之載旌招搖封狼旣殘復生

獬豸

皇赫斯怒繩其

祖武

七章

祖武維揚我

皇不敢康高居北極洞視遐荒一夫爲逆多方則病

天討恭行知中國之聖

八章

右

皇風八章章八句

干城命將也班第等率輝特台吉阿睦爾撒納

感激用命克成敵愾也

國有干城丈人之貞推轂闕外授鉞以征

聖皇神武簡茲心
臂如熊如羆如方叔召虎
一章

惟

帝知人惟

帝大度日磬篤慎忠信是著
泛駕跣跣咸歸善馭造

化爲鑪羣才就鑄
二章

惟爾元戎懋武古通師克在和
寅恭厥衷楚材晉用

尙奏乃功

皇綱寬大莫敢不鞠躬
三章

乃飭戎車乃秣乘馬大袒高驤魚魚雅雅凌山雪積
熱海波瀉枕席過師從天而下

四章

扼其首尾軍分西北兩道邁征有嚴有翼仡仡赳赳
萬夫之特

王者本無戰戰則必克

五章

仁義之師往救水火支黨旣離獨誅首禍沙揚於磧

草枯於原時雨兵至藹然春溫

六章

轉饒不煩士馬利賴首稽葡萄貢諸塞外指顧山川

如礪如帶笳鼓饒吹雜之歌唄

七章

帝有虎臣天罰用申罰之不以武懷柔遠人遠人來
服匪由予戮咫尺龍沙不隔西遐

八章

右干城八章章八句

天馬通西極也噶爾丹多爾濟居羅克闐之地
爲賊巢門戶迎師助戰師無阻也

天戈莅止天馬乃徠師行如山絕塞雲開布之以德
耀之以威水流赴壑萬衆來歸

一章

蠕蠕之衆南庭雄長自固其藩籬比周爲黨天塹茫
茫恃險以壯昔聞怒臂今迴稽顙

二章

先帝省其山曰狼居胥旌旗萬乘西域來鋪雲氣飛
揚大風與俱仰追

駿烈萬帳歡呼

三章

歡呼來迎耕牧不輟仰父俯子完其家室令肅秋毫

戒爾繹騷馬騰士飽嘽嘽治治

四章

亦有積寇逋逃淵藪師壓其境執訊獲醜罪人斯得

天網不漏况乃狡狂肆爲戎首

五章

自昔師行日三十里今茲神速長驅直指遠逾葱雪

若在庭庑曾不遺鏃曾不折矢

六章

凡此降人彼亦何辜如溺如焚罹此荼毒

帝有恩言萬里來宣薄饗其有椎牛醢酒

七章

衆志成城殲爾渠魁王師如雷霆崑崙以頽左搗其

虛右攻其堅載闢載被迺翼迺前

八章

右天馬八章章八句

伊犁直抵巢穴擒獲達瓦齊以獻大功成也

乃抵伊犁伊犁是平彼昏以狂三窟不得營罪惡盈

貫獸窮乃竄剝絕根株毋貽厥患

一章

其巢斯焚其穴既掃日月照臨不容火燭游魂就縛

滅耳何校靖厥埃氛還諸晴昊

二章

之屏之障酒泉燉煌中國一家甌脫相望土圭測景

疆開地拓爰遣章亥是究是度

三章

日升於觀天啟其門獻俘告捷露布以聞帷幄千里

孰尸其功孰尸其功斷自

宸衷

四章

宸衷默定朗如金鏡握算制勝不日而竟振旅言還

朱鷺巒巒楊柳無思雨雪不愆

五章

大武旣張威憺八荒

皇心彌兢業業皇皇曰非予之力

祖功

宗德纘乃丕緒不遑日昃

六章

既右

列祖亦右

文母慈訓親承克昌厥後晉以

徽稱寶籙宏膺岡陵川阜以莫不增

七章

乃發明詔渙汗其號飲至策勲豈弟是勞地平天成

神人以寧遂開明堂永享太平

八章

右伊犁八章章八句

平定準噶爾饒歌十章

謹序

梁國治

臣謹按周禮大司馬王師大獻則令奏愷樂左
氏傳曰振旅愷以入言克敵獻功衆志和樂愷
歌示喜也又按蔡邕禮樂志漢樂四品其四曰
短簫鐃歌鐃歌軍樂所以建威揚德風敵勸士
也洪惟

聖朝

列祖

列宗天挺神授肇域函夏乾覆坤載日月出入之域

莫不率俾我

皇上緝熙廣運宜耀文武丕顯

列聖之光烈使萬國肆靖海寓寧壹屬者準噶爾竄
越荒服世勤

天征孽豎達瓦齊更煽遺燼用纂易亂內則破義犯
分誠行放奪於上外則離心攜志憔悴怨黷於
下酋豪大長蕃部區落之衆延頸而睎曰

天曷不降威於我邦於時都爾伯特台吉策楞策楞

烏巴什輝特台吉阿睦爾撒納等率數萬衆以

降

皇帝曰時哉惟

天惟

祖宗用全付予下土予惟夙夜祇慎克相

上帝續我

祖之遺緒惟一二臣實協贊予其克果斷允濟乃

命班第等徂征副以阿睦爾撒納等董莅元戎恭行

討伐熊羆驅虎之士萬計千羣戈甲耀山川旌
旗動雲日赫赫業業不旬月間而

皇威所屆震萬里而遙矣乃收烏梁海又擒兩瑪木
特又納其前後降人動十萬計莫不投鎧呼舞
望風厥角牛酒迎勞壺漿盈溢自非我

皇上神聖威武內秉乾斷則曷能迅掃絕域矢不控
弦血不染鍔者哉且伊犁者天地之阻極深之
庭偪仄幽隘餽餉磈礧飛鳥戢而不敢下懸猱

慄而不能升烈烈我師聲懔天靈彈壓山岳震
駭雷霆絕大漠以橫制縛元兇於龍庭乃以今
年五月俘獲巴朗孟可特墨爾及羅卜藏丹達
等越六月生縛孽豎達瓦齊父子械送

京師將上以揚

列聖之神武下以撫蒞邊徼振耀華夏創萬古之威
名然後

皇帝告功

天

祖崇上

聖母皇太后徽號宣布

德音中外咸慶羣臣頓首稱賀

皇帝讓善歸德穆乎謙冲永圖艱而保勝祗申錫於
皇穹凜乾健之惕若思垂裕乎無窮蓋所以耀

文德建

武功威異域而柔萬邦也

臣

備官國學仰觀

聖上勲烈隆盛照耀天地不勝踴躍喜忭形諸舞咏
伏念古有饒歌鼓吹之曲不揣鄙陋敬譔十章
拜手稽首以獻

帝之臨第一

帝之臨赫以顧有不恭膏天斧授我神柄立天地主
萬國奔走羣靈震俯有蠢準夷獷伏嚙咀

帝謂我

皇往蒞人士仡仡烈烈以遏凶怙

帝之臨赫孔武界

皇謨駿鴻祐揚天戈殷雷鼓

聖武揚第二

皇帝神武纘我

祖宗惟克果斷承荷

天寵羣議震沮惟予汝同

皇旅有赫螭虎羆熊元甲朱纛溢其戈鋌嘽嘽我馬
亦有駉駉桓桓上將實統元戎往戒有衆以卽汝功

從軍行第三

抽刀斷隴水拔劍擊邊雲
出師萬里外誓掃絕漠塵
請纓男兒願乘時策功勲赫赫

聖天子神威古無倫一舉蕩沙磧闢地窮崖垠
狐兔竄穴窟不足煩我軍紅旗朝獻捷駝馬動千羣
壺漿溢道左廝養皆歡欣從軍意慷慨計日戎務竣
歸來宴平樂功名圖麒麟

納降人第四

納降人乃在玉關之西輪臺之北扶攜襁負來邊庭
道傍稽顙爭匍匐孽豎達瓦齊乘亂竊家國恭聞
大皇帝萬里宣威德

乾坤覆載無不容俾爾子孫世臣僕納降入出汝水
火開生門賜以繒帛千萬匹酒食精鑿牛羊豚此皆
感激乞効命長驅鐵騎如雲屯生擒賊渠獻
雙闕宛馬葡萄何足論

雪山第五

雪山高石磊砢雲蒼茫天四下乘飛黃汗流赭塵揚
揚風追馬雪山高水清瀉披氛翳豁卻開揚
皇威靖朔野扶奔鯨戡么膺鼓振振
天聲播兵兩道紛遮邏

伊犁第六

伊犁山不可過一夫守隘萬夫莫禦伊犁河不可朔
陸行無梁水行無度誰將天險授我軍

帝遣神靈默憑護擁刀上馬入賊營千軍萬幕星羅

布礮車轟天起夜半賊軍人馬都驚避拘囚纍纍伏
馬前豈有天羅脫狡兔羣蕃伺汝利上賞縛汝獻功
爭汝捕

俘渠魁第七

穴之掃窮獸奔囚車檻送來噶噶繫之尺組牽其元
破碎心膽褫魄魂昔爲封狼今孤豚薦之於

廟慄伏門或赦或殛皆

帝恩天清地曠祛妖氛

告功第八

揚天弧震雷殛威朔漠告

穹蒼牲牷肥腍蕭芬芳格於

祖廟善不忘武義赫奕馳八荒

皇風灝灝高虞唐功踰萬禩於鑠顯光

大愷第九

露布日千里歡聲齊六幕大軍椎牛饗饒吹轟天作
皇帝曰汝功有賞量錫爵大者封王公次亦侯衛霍

偏校及卒伍

洪澤何溥博浩浩唱凱歌清風蕩沙漠

萬年樂第十

考鼉鼓鏗鯨鐘賓協六服臣九戎

皇帝陛下萬萬歲聲教洋溢天地同大開明堂受朝
賀奉進

寶冊輝璇宮遂行慶典發

大號萬類忻暢歸悃懃

天章紉綬輝辟雍俯視獵碣漸雕蟲歲千萬億樂懋
豐普天率土聞呼嵩

平定準噶爾饒歌十章

謹序

吳鴻

國家受

天景命百有餘年聲教覃敷幅員無外

皇上纘承

洪祚赫有烈光以文德康兆姓以武烈靖邊陲絕域
蕃庭罔不臣僕準噶爾夷部阻恃荒昧篡竊相

尋孽豎達无齊悖亂天經逋誅肆虐憑陵厥屬
衆志无解諸部之長內嚮懷思叩關來歸者累
以萬計

皇帝曰惟

皇天覆冒之下皆我赤子於此弗靖其何以綏予有
衆且

皇祖

皇考聖武之緒將受成焉敢不肅將天罰以丕承

前列爰命將軍班第等分道進師而卽簡新附之渠
帥爲導師行大漠如霆震物如雨澤枯羣心喁
喁壺簞載路遂抵伊犁之境滌蕩瑕穢輯寧蕃
落渠魁就獲準夷悉平露布至京師

皇帝乃告功

郊

廟典禮具舉敬惟

聖母大德晉上

尊號行慶施惠達於上下以樂救寧而昭

鴻祐焉是役也轉餉無半載之勞旋軍靡寸鏃之費

而犁庭奏績獨憑

宸斷決勝萬里獻俘

闕下服者舍叛者誅煌煌乎

國家之駿烈

聖神之景鑠具在是矣臣伏讀尚書有西戎卽敘之

文知荒裔來庭盛王弗棄逮漢孝武始通西域

都護所治咸佩印綬而屬賓安息之屬阨塞阻
絕不入簿領用師數載僅乃羈縻詎兵力弗及
葢恩信未洽焉今我

皇上之建斯績也義正乎取殘仁孚乎綏遠道全乎
繼述謀篤乎

燕貽茂實英聲騰蹕往牒

皇上猶淵思撝挹却而弗居詎非疑命勅幾保泰持

盈之上理歟

臣備員

講帷職司撰述伏睹

盛烈煒煌實忭且舞謹做漢代以來鐃歌遺意作爲

歌詞十章冀以宣揚

聖德之萬一附於愷樂之奏其辭曰

聖武布海宇清光日月驅風霆奠三極走萬靈天山
嵯峨作外屏猗歟

二后征不庭流沙萬里揚天聲揚天聲恢

帝載許並生保爾塞芽萌不翦

皇天慈嗟爾易世種已非肆爲大憝凌荒陲

天討有罪集我

王師曰豈予于爾是殛爾孽自取之

右

聖武布一章二十句

智士審安危邊情知向背喁喁萬里心回首齊面內
玉門光祿天門開

君王有道觴鈞臺扶攜襁屬歸平來拔劍舞欣有主

今我乃得歸王土盡言往歲迫逐苦願仗天戈驅獫狁完我族屬錫我圭組

聖朝懷遠惟至誠羣蕃稽首同太平

右羣蕃朝一章一十六句

帝念遠人亦旣勞止我怙我恃而使失所

帝謂茲寇百年之逋彼惡貫盈而稽

王誅乃定

神算乃眷同德乃建上將乃授雄戟虎臣桓桓禁旅

閑閑及爾名蕃往取其殘穆穆

帝心萬里爲家

二后在天佑我

廟謨

右

睿謨運一章二十句

從軍抑何樂整旆出大荒春風被沙磧絕塞百草芳
苜蓿遍廣野馬肥弓力强邈邈到山谷夾道紛壺漿

將軍領前旌武勇衆所望開陳

天子德無俾耕牧妨羣蕃馬前拜歡躍迎天兵皇哉
仁義師氣與風雲揚

右從軍樂一章一十六句

伊犁何迢迢遠屆康居域條支障其西大宛縋其北
千年阻幽遐么膺此窟宅一朝天軍至奔竄將奚匿
將軍夜半揮神策萬衆降幡空賊壁縻以尺組渠魁
得遠夷孚信軍門趨日月照耀臨荒區

天朝威德同歌呼同歌呼

帝萬歲邊塵息

皇恩沛

右定伊犁一章一十八句

王旅發兮國門指柳色兮方春越青海兮赤嶺望黃
河兮白雲

王旅旋兮西極數瓜期兮未卽洗兵氣兮交河飲神
泉兮疏勒漢家昔斬樓蘭唐室繼定天山我

皇神武不殺一怒天下胥安邊風靜兮萬里笳鼓殷
兮四起入玉關兮揚揚提書奏兮

明堂

右歌愷旋一章一十六句

揚休光昭景祐燕

皇天衍

列祖感

洪造括區宇功赫濯德昭清懷

謨烈丕顯承永延長凝淳精雷鼓磻天聲起累囚倖
皇受祉瞻

鳳樓五雲裏雨祁祁露濃濃經靈臺望辟雍揭豐碑
銘

皇功

右武功成一章二十四句

皇帝大德奄有西極羣臣上言宜奉顯號昭

皇帝之績

皇帝不有曰惟我

聖母慈仁篤祐百福是受迺詣

瑤殿進

金冊輝玉寶遂告

天地嶽瀆嘉與海內德施孔厚千官拜手稽首謂

聖人至孝

聖母萬壽惟

聖孝之被光於四海惟

聖壽之長應於無疆

右

慈慶洽一章二十二句

九伐旣飭而邦國寧四征是舉而王道平青徼投戈
遂銷鋒鏑靈臺偃伯乃靖甲兵信

王者之用師不戰知

天地之大德曰生吏譯傳風

大朝安樂遠裔慕德長請爲氓非徒讐泰武於殊俗

益以昭大定於永清

右大無外一章一十四句

帝德廣運高如天

帝祉繁集崇如山
窮日所入盪河源
迅掃埃壒如風
烟金城玉塞萬里延
遂修樽俎秩豆籩
休氣布濩該
八埏惟

帝惕若中心乾
紹庭繼序長弗諼
明良一德惟思艱
五行既序三光宣
和風甘雨屢豐年

微臣

作銘陋燕

然

皇帝聖德昭無邊

右

帝德運一章一十四句

平定準噶爾雅三篇

謹序

莊培因

臣培因言 臣以郎官直樞禁五年

聖慈拔擢備員詞館侍

講幄時立

皇清文宗廟制
卷三
殿陛下瞻仰

日月之光葵藿微忱曷勝蹈舞伏見我

皇上天造神斷克平西域纘承

丕緒篤慶萬年偉績洪庥稽古罕及

皇上兢懷彌切功成弗居篤顯承之思著歸美之義

敬告

郊

廟薦明禋載舉彝章晉上

慈官徽號酬庸行慶愷澤覃敷懿典隆茂豐功炳鑠

溥海內外踴躍歡騰

臣

伏觀於詩大小雅天保

之章備諸福之美繼之以采薇杕杜時雖太平

不忘克詰所以昭常德而立武事告成功于神

明也然當時命將出師征行之地南不過淮徐

北不過太原而其臣尹吉甫召虎等作爲歌詩

極鋪張揚厲之美今師行萬里揚旌絕域曾未

半載而大功底定俘厥渠魁無轉輸飛輓之勞

一矢半鏃之費至於蕃部厥角壺漿恐後役降
人如素隸行間者威德所敷聲教所訖方之三
代奚啻過之漢唐以來蓋無足述臣學識卑陋
幸逢

盛際知不足揚挖萬一而蹈詠之忱實倍恒情輒
不自忖量謹撰平西戎雅三篇拜手稽首以獻
皇謨命將出師也

睿謨獨斷克平西陲大功告成焉

於鑠

皇謨適駿其武爰整戎兵宅我疆宇義問宣昭大德

遠撫軌物旣同西荒卽敘

一章

邇矣西荒懸度迺通維我

清受命威懷萬邦日月出入罔不率從阻我聲教自

貽鞠詁

二章

離離芣苢有繁其實憬彼名蕃欸塞來謁以其屬來
乃婦乃子疇渙其羣俟我

共主 三章

皇省厥忱灼於幾先惟斷惟行以耆我勲

皇咨相臣惟汝一德

皇咨帥臣惟毅必克 四章

皇命上將寅受師成錫爾斧鉞昏頑是懲日覆日載
靡不煦嫗曷云來告弗拯其痛 五章

皇命名蕃寅受師律繫爾前驅以導以發漸漸父河

湯湯流沙

王師旣行有坦其塗

六章

王師旣肅旣肅且閑匪疾伊馳匪競伊桓以我禁旅
暨我諸藩各奏爾力侯常厥服

七章

彼澤之陂言采其蒲我馬旣調我師我徒蜃弭魚鼈
熊飾其旂鼗鼓淵淵威命作孚

八章

旣躋雪山陟降靡靡如霆發榮震驚西戎大武昭矣
惟

皇之威大功定矣惟

皇之謨 九章

昔我

仁祖三駕西陲暨我

憲皇用張六師

天申純佑廓我車書續

二后之緒億載維祺 十章

右

皇謨十章章八句

伊犁平西域也將軍班第等旣受

睿畧遂犁西戎之庭盡撫其屬人衆得羅卜藏丹津
等回人遮擒達瓦齊來獻先後俘致

闕下

伊犁汨汨言厯其流

王旅乘之爰掃其間有易其阻其間旣徹赫赫

皇圖大荒有截

一章

蠡爾西戎弗念天常自彼枿餘是竊是戕是奪是攘

究究厥屬潰潰厥徒內訌于家

二章

王旅旣峙峙乃芻糧芻糧弗靡載路壺漿無驚爾牧

無稅爾耕豈陟遐荒繫我編氓

三章

王旅旣俶俶乃弓矢弓矢弗舍曾莫我敢禦爾牧閒

閒爾耕畎畎豈陟遐荒履我庭闕

四章

王旅旣礪礪乃戈矛戈矛弗施曾莫我敢渝鹽澤之

濱蒞蒞之陬有醫者泉佐我軍儲

五章

旣獲烏梁番部膚來輸其車乘與其羊牛鳥焚于巢

獸窮于音彼昏卒殄沉酗罔念

六章

王旅渾渾自天而下仍執逋囚爾順則撫增增番人
有樽其舞

皇拯其危若枯澤雨

七章

其舞樽樽載笑載言率其旄倪拜我師臣有翼師臣
播我

皇德挈爾水火偕之衽席

八章

匪狼則狐蔽于莽邱遏之係之得其渠魁于

廟于

社稽古受俘以正反側以迄天誅

九章

伊犁旣平奄有西域至於泰蒙康定四極粵稽有虞

七旬苗格億萬斯年視此豐碣

十章

右伊犁十章章八句

純祐功成告

廟行慶典也

皇帝歸美

聖母崇上

徽稱大孝錫類澤洽中外焉

天篤

清祐介以遐福

列聖繼承昭哉謨烈

皇祇受之兢業不遑

天申錫之光宅萬方

一章

萬方攸同

皇則宅之維彼遐逝

皇則度之

皇澤西荒大德並生底定我功匪戰伊征

二章

勤勤將帥致果卽戎爾爵爾珪聿酬爾庸憬彼名蕃

來效臣僕式是諸部有章命服

三章

濟濟臣工稽首於陞

天子聖神參天兩地

皇穆以思惟

祖考之佑既顯既承虔共孝祀

四章

濟濟臣工稽首於庭

天子聖神篤慶萬年

皇懌其容惟

聖母之訓載稽禮文

鴻稱聿晉

五章

乃詣

慈宮敬奉玉書再拜上言

皇儀孔愉金冊煌煌寶篆龍章以天下養大孝光明
六章

皇御正殿受羣臣朝有煇雉羽華旂象輿昭我王會
萬方來慶

天子萬年景命有常

七章

皇誥萬方大澤是溥百辟卿士便蕃錫予顯明儀式

洽於神人大矣德施逮我黎蒸

八章

惟

聖廣運直駿不續既底武功光我文德

皇敬蒞之惟乾惟惕勗爾有位罔懈于職

九章

既敬既勗

皇德維崇對越有恪答于

蒼穹登茲太平阪章孔厚億萬斯年以永純祐

十章

右

純祐十章章八句

平定回部凱歌十六章

謹序

秦蕙田

臣

聞天之所助者順也人之合天者德也若夫
首出庶物亭育羣生文治緝熙武烈翕赫外薄
乎四海有或不戢不若者維時其殄滅之毋俾
易種於徼外建莫大之畧成不世之功有開必
先動與天合者其惟

聖人乎粵我

大清光宅區夏

列祖功德垂裕無疆惟休

皇帝陛下嗣大統越茲二十有四年惠澤浸衍東西
暨朔南懷柔震疊負陰抱陽之倫喁喁向化無
遠弗屆伏見比年以來伊犁底平廓清

兩朝之逋寇四衛拉特之反覆不順命者咸斃而刈
之哈薩克左右二部泉東西布魯特察什罕並
遣使納貢贊朝

京師獨大和卓木波羅尼都小和卓木霍集占兄
弟故準噶爾之屬部囚之阿巴哈斯鄂拓大軍

定伊犁卵而翼之俾返而所顧乃背惠食言狀
虐我使臣多爲不法

皇帝曰吁其又可赦乃遣將吏適征撤其藩籬掃其
巢穴葉爾羌喀什噶爾二城以次撫定賊計大
窘遠遁拔達山之境其汗素爾坦沙邀而殲之
遣使獻馘舉部稱臣捷書聞自

闕庭達於康衢臣民同聲歡忻式歌且舞廷臣僉
議上

尊號

皇帝讓不許曰惟

天惟

祖宗相予有家且賴師武臣力以集茲大勲也乃命

禮臣慶典具舉臣惟太陽升曜不能燭魍魎以

光明惠風扇物不能革鳴梟以好音故雷霆雨

露者天之教禮樂征伐者

聖皇之法彼霍集占負恩倔強自作不靖背雨露之

澤以干雷霆之誅於人爲不祥於法爲不宥而
天兵所加星馳電掣滿洲索倫之勁旅張拳徒搏一
以當千迎之者瓦解觸之者潰糜則我

皇之信賞必罰以作其勇也諸伯克回頸面內籍其
城郭人戶比於郡縣或乞先驅爲我鄉導則我
皇之闡示大義以馴其俗也安集延拔達山諸部語
言不通人跡罕及而檄書所加靡不援戈爭先
故能豐溫禺之血函邦支之頭露布遙傳誓表

踵至則我

皇之布昭威德以懷其心也夫如是則何堅不摧何
逃弗致自伊涼以西疆索式闢設尉候而頒正
朔者二萬餘里洪濛以來咸未始有非

至聖聰明睿智神武其孰能與于此哉且夫非常之
原黎民懼焉杜築室之謀任穆清之運聲色不
兆安坐而決之至勇也萬里之外軍書旁午發
蹤廟堂之上燭照數計勢若轉規捷如應響至

神也轉戰絕域而內地不知調發之擾振貸之恩有加復除之令歲下至仁也追維

列聖付受之重若作室家其勤垣墉聿繩厥

武於斯爲大至孝也

祖宗以重光之德享

天之心

陛下以繼序之心合

天之德在易雷在地上曰豫豫者行師之卦也其傳

曰豫順以動故天地如之其我

皇之謂與然猶昧旦丕顯日慎一日思無逸之戒念
配命之艱吉日南至告功

皇天越翼日朝

皇太后於

壽康宮

御正殿

頒詔海內將以熙武成錫繁祉中外禔福遐邇蒙休

巍巍乎煌煌乎雖古盛烈何以方茲臣職忝秋

官親遊執馘獻功之典謹擬饒歌鼓吹曲撰凱

歌十六章播之管絃辭雖弗文冀以宣述萬一

拜手稽首以獻

聖人出臨九州仁如春義如秋溥海外職貢修獻琛

至樂德謳伊犁定布露收大宛款于闐柔孰順命公

與侯孰不順俘而囚萬里外速置郵

皇之威櫓遐陬

右

聖人出一章二十句

蠢爾花門孽大小和卓木厄魯特未亡俘而拘之久
桎梏前年大將征不庭俾返爾邑子爾氓俾爾生死
而肉骨爾不知感非人情霍集占禍之首黨大慙助
羣醜謂王臣可戕謂

天恩可忘自作之孽不可長

右花門孽一章十五句

鑠

王師征西裔前扼吭後拊背初臨庫車城三勝張威
弧彼昏自投網所惜跳而遁

天子將將大將將兵功多受上賞不迪有常刑改命
帥臣號令行阿蘇款烏什降大伯克前隊從深入擣
賊巢賊計益窮

右鑠

王師一章十九句

猛虎闖擊鷹揚壯士肉薄堅城傍鼠穴蹙螳臂張悉
醜旅抗顏行彼衆我寡彼怯我勇以我四百人當彼
數萬衆馬力竭猶可用黑水築堡屹不動血戰百日
守益堅蕃兒詫舌心膽寒耿恭拜井何足言

右黑水堡一章十七句

皇之謨協

昊穹神惟幾與

天通索倫勁健銳雄部署久出

聖衷趣之赴援克有功涉兩月踰千峯出戈壁摧籠
東鬪氣倍勃怒同兩翼布八陣馳雷霆迅風雨隨擣
穴捷攻心奇

皇之謨人莫窺

右

皇之謨一章二十三句

歲屠維月孟陬援軍雲集行不留八門張中權奮蹂
重圍斫堅陣士先登馬繼進內外夾擊迅以振駭鹿

犇投免僨兩軍合萬眾謹我氣厲彼力殫阿克蘇整
旅還

右兩軍合一章十八句

日月照雪霜滅虛弓指飛翼折天戈將臨賊讐慄兩
酋相顧計安出悉其種人竄而軼飛鳥焚巢獸離穴
不子影伏心膽裂昔何倔强今恇怯噬臍之悔真何
及

右日月照一章十一句

尺書手詣大將營兩城伯克爭來迎壺漿牛酒夾路
盛將軍按轡西入城宣恩信布至誠不順者爾誅來
降者爾生脫戈鋌安稻稭告爾子弟爾父兄拯爾疾
苦求爾寧回人泥首言今始見太平

陛下千萬歲吾儕終古作太平氓

右兩城降一章十六句

昔回中民劫洞竄伏荆棘生無聊今回中民樂陶牛
羊橐駝生計饒番女織氍毹園戶輪葡萄麥稭棕帕

特盈錢刀布騰格徵賦稅減人戶增勸耕作釋甲兵
老有養幼有成寐者覺疾者生回民樂樂

大清

右回民樂一章二十二句

廩之奔荒谷中選上將躡其蹤張罟網施牢籠霍斯
庫魯始交鋒獲首五百京觀封阿爾楚嶺再奏功電
矛雨矢十盪衝伊西洱水淙淙降幡四面豎厥角頓
顙同咄汝几上肉跼伏喙息將奚從

右廩之奔一章十六句

拔達山花門族誰其投者和卓木幕上燕釜中魚艸
間苟活求須臾將軍尺一招致之蕃王彎弧介馬馳
邀而擊之靡子遺縛狹狹猱殲封豨血日逐糜谷蠡咄
汝貳負之尸三窟徒鑿將安施頭行萬里誰所爲

右封豨殲一章十六句

都九持表進

至尊可汗樂德稱外藩願隸典客備九賓玉關西露

布陳函逆首詣國門

皇之威雷霆震

皇之恩雨露均逆天者亡順天者存日所出入處共
惟

帝臣

右露布陳一章十五句

上天眷在有德

列祖受命下土式繼

志述

事

聖之職豐功紹式廓增巍巍盛烈

帝不矜曰

天與

祖其式憑日南至用大牲工祝告

園壇升

太廟享惟德馨大祀中祀以次舉行神人洽頌聲成

右神人治一章十八句

肅

璇宮進瑤觴稱

萬壽迎初陽御

紫宸開天閭

鸞詔下

鴻恩洋溢九有覃八荒熙熙氓咸樂康赤雁集丹鳳
鵠于闐采玉來尚方昆侖織皮厥篚將蒲梢天馬驂

上襄請圖王會陳明堂

右王會圖一章十八句

日星燦雲霞分倬

天章紀大勲於樂辟靡賁鼓陳豐碑三度懸橋門匹
誓諾垂典墳配石鼓巍以尊龍沙之西洱海垠摩崖
石高嶙峋我

皇威德億萬春

右倬

天章一章十四句

我出我師乙亥初吉越茲五稔大勲再集玉門關之
西二萬里而遙章亥所未步咸與歸

天朝吾

皇天錫智勇超

神謨運邁六韜王師旋勞遠郊敘勲名麟閣高奏愷
樂節以饒述

聖德垂劄韶

右奏愷樂一章十九句

平定回部鐃歌十二章

謹序

劉星煒

臣星煒誠懽誠忭稽首頓首謹言洪惟

皇帝陛下睿聖文武燾育函夏罔不率俾旣存金川
龕伊犁大宛左右咸節春秋吏願爲臣僕蠹茲
霍集占波羅尼都本回紇種人賴我

朝如天之德脫其尺組言返舊巢顧聞懷封豕之心

虔劉王人弗懋

皇帝赫怒遴將致師地湧神漿天降膏澍左言頓顙
堅城洞摧二酋鼠憂蛾伏歸命無所羣殲於拔
達山曩事之殷在廷以險遠告

皇上默運神武六合之外折筮使之計動衆不逾五
年舉遐荒殊域循蜚因提以來職方所不紀者
奔走讐服伊嗚通於鞮譯狙獷懸於藁街唐哉
皇哉

皇帝念

上天於穆顯相發祥輯祉之盛

祖宗顯庸懿鑠裁基錫祚之隆欽崇宗祈羣望咸秩
爰以獻歲仲月祇謁

陵廟大告武成回車次於近畿殷殷闐闐

王師大凱鳴葭攬鐸後舞前歌

皇上嘉方叔之壯猷倦吉甫之永久郊勞飲至典禮
聿新夫鋪敦懿鑠鴻烈也虔鞏勞謙盛德也自
今景員式廓迄於流沙以西萬萬禩未有倫比

而羣公卿士秉承

方畧蔚爲干城貔虎能罷刈於禁衛用以居安保泰
建威銷萌實惟我

國家無疆之休

臣

不勝慶幸謹案黃帝時岐伯作

短簫鐃歌導揚威德周官大司樂所載王師大

獻令奏愷樂

臣

不揣穉昧謹撰大兵凱旋鐃歌

十二章附於率舞之末以獻

厄魯特底平回人逆命選將致討爲伊犁第一

伊犁旣平大宛旣徠左部右部隸於家陪有怒伊螳
有噬惟虺曰和卓木是爲渠魁馮介險假以給羣回
我

皇赫斯

天戈用揮僨轅有誅專閫是推烏什畢逋和闐洞開
蹴踏四城靡堅不頽迺釐貨泉夷其場萊周陟兮彌
天獸之窮於乎徘徊

將軍兆惠固守黑水堡援師夜集賊衆魚爛爲

景

圓靈第二

景

圓靈迓純嘏鳴龍角桴桐鼓酒泉兮出泉火州兮無
火黑水堡河以西大將旗采入之吹脣數萬迴四隅
伐山爲薪掘穴出粟銅丸纍纍寘空木飛礮出火賊
夜哭援軍肉薄振林谷平明潰圍全師出叶士無面
傷兮矢無遺鏃

天之威

皇之福

逆回窮窟葉爾羌喀什噶爾二城乞降爲回衆

第三

回衆如連雞一蹶百不支二酋焚其巢脅從咸分務稽首

大皇帝曩罪冀勿治椎紒解辦燹蠡戴首輶輶載塗
訾黃在廐撤渠答隨指噤易彼騰格置官守通我玉

門列亭候隸疆圉效奔走淶澤施渥恩楸鼓之舞之
猷我

后

我師三路進兵兇渠數屻爲桓桓第四

桓桓將軍三方分攻戈鋌彗雲騎駭追風扼之高陵
爰蹈蒙叢霍斯庫魯有恆其兇我兵蹙之以少擊衆

叶

阿爾楚爾疆鯢是封棄其車任魂遊釜中遁逃伊

西妄干鈇鋒赳赳武士電掣景從天風揚焱飛走路

窮爰卽丕刑耆定我功

拔達山汗素爾坦沙納降効順二酋殲焉爲拔

達山第五

迢迢拔達山遠道踰流沙兇渠走且殭伏莽以爲家
名王懽威稜檄索先要遮勢面誦

明詔撫臆辭嚶呀詎敢登叛人驅屠同蹤玃願持郅
支頭陳之於藁街用以示蕃落叛亂無萌芽吉語馳
明駝朱旗燦紅霞是時歲陽止竟野繁春華

宣室進捷書中外胥休嘉

露布告捷敬答蕃釐

郊

廟威秩爲肅精禋第六

肅精禋荷靈祐熙

紫壇獻清醑辰旂載揚躬薦芳俎

黃祇效琛

列聖啟宇崇嶽渟海遠皇遠古鴻洞旭卉相子繼序

燔瘞懸沉羣望咸舉舞聖旄歌夏武拓地倍萬厯歲
云五豈予一人惟

天惟

祖

大告武成

慈寧悅豫爲熊旂第七

熊旂絕漠揚威

黼辰乙夜疇咨

歡畧萬里制師

璇宮式奉

慈徽露布馳

慈寧喜從此殊方遂洗兵
員興所覆咸置理迓純禧
上

崇號虔奉

文母闡孝道揚鴻謨陳寶書祝延

鼎錄衍瑞圖德幽於義軒勲懋於黃虞

聖駕祇謁

陵廟導揚

鴻烈爲

珠邱第八

珠邱孔明蕙圃蘭唐吉洞上丁雷動天行鑾輅脣飭
虹旂常羊八神首塗九譯賓將自東于西祇告武成
祇告武成匪予佳兵昔我

皇祖惟西垠是疆賁其種人貽我

憲皇攘之縻之犁庭未遑弓劍在縣以薙以獮敢不
獲見於

寢園休有烈光

大兵凱旋

駕駐近郊勞師禮成爲龍堆第九

龍堆沙玉關柳金城五年行永久冠孔鸞衣黼黻介
圭九命恩單厚

六飛駐神畿赤羽白羽揚明輝短簫長篳吹參差

天子宴勞歌采薇將軍跪飲金屈卮被犀渠簪虎僕
侍臣中禁皆頗牧翹關超距集輦轂軍容高驤震下
國

太學古獻馘地

天文丕煥穹碑三樹爲豐碑第十

戩戩豐碑靈螭蜿蜒日文月章晞光於天底平大憝
曩烈有虔遑敢定居益茂乾乾寅恭

寶命翠琬用鐫樹之橋門觀聽萬千文軌于臻武功

于宣珠墳祇庸簫勺八埏勒崇垂鴻以登介邱胡厯
焉

師行甘涼耕鑿無擾

殊恩疊沛邊徼敕寧爲六郡第十一

六郡車接軫三州騎連營師行無驛騷枕席靜不驚
我

皇倦焉顧下

詔甦疇昨全蠲所入租會見高廩盈更慮師旅餘庸

有荆杞生假以穀鯨牛叱犢催春耕賑以茨梁粟饌
玉炊香秣尤軫荷受人三年感鵲鳴修矛義形色慷
慨赴鼓聲溥資恤烝徒九有頌義兵

膚功既奏文事聿修論秀恩覃省方禮洽爲桃林第

十二

桃林偃革大賞醲明堂讀冊鏗華鐘龍章絳繚愬武
通賜爵一級禮秩隆哀矜庶戮貫匪終水衡之錢逮
疲癯廣蒔林闢文囿綏方夏升孝秀鷺羽鵠魚藻茂

敷天宴娛慶曼壽占五繇告祥習奉

金根馳玉勒循魯齊煦揚越惟

天之行周四極

平定回部鐃歌十章

謹序

吉夢熊

皇上御極二十有四年孟冬月日將屆長至將軍

臣

兆惠

臣

富德等以拔達山汗素爾坦沙效順

力逆回霍集占授首回部底定捷音上

聞仰戴

皇上駿烈豐功神幾炳算超越萬古爰以成功上告
郊

廟迓庥

慈寧策勲酬庸

恩澤澍濡典禮茂舉羣臣咸作爲歌頌以紀功德

臣

荷

聖慈以文章爲職業茲躬逢

景運昌明

皇猷赫奕興師不越五年拓地二萬餘里承

上天之篤佑縣

宗社之鴻庥忭舞之誠彌切寤寐謹按黃帝克涿鹿
命岐伯作雅樂軍中歌之世所傳鐃歌是已周
官大司樂職王師大獻則令奏凱樂大司馬職
師有功以凱樂獻於社葢卽鐃歌之遺意自周
以下漢短簫鐃歌朱鷺十八曲古今樂錄以爲
字多譌誤厥後魏繆襲吳韋昭晉傅休奕宋何

承天梁沈約唐柳宗元之徒咸有撰述其辭旨
不同大抵敘征戰之功揚綏緝之烈義與雅頌
相表裏臣不揣夤陋謹擬平回鐃歌十章指事
錄實不敢妄希采芑常武遺響庶於

宸斷獨伸

天心助順之盛軌揄揚萬一稍竭葵忱云爾

皇上纘承

祖緒德威遐揚平準噶爾全部西陲萬里歸我版宇

左右哈薩克東西布魯特咸奉賁輸誠作揚

神武第一

揚

神武續

祖德功耆定威有赫金川平伊犁闢揮琫戈拓玉冊
周索廣禹甸飭風以柔日以超我疆理我城洫通梯
航哈薩克奉琛賁布魯特被流沙至西極胥順軌無
作忒惟

皇仁奠爾宅孰恒兇撓誅殛

逆回霍集占兄弟向爲準噶爾梟俘

王師平伊犁釋使歸撫其土逆回負

恩助阿逆以畔

皇上赫然震怒聲罪致討蓋不得已而用兵所以應

天心承

祖志也作奉

天討第二

奉

天討賴我

皇聖武曰惟回首鞠頑不念我輯撫敢助元兇恃投
以怙連雞張鴟實爲大憝我

祖有天憲不敢以懈雲旗雷鼓夷凶攻昧迺駭以逃
扼吭柱喙我貔我虎各敵

王愾誓滅朝食以釐絕塞

皇上命將軍兆惠富德等兩道並進搗賊巢穴遂克

庫車收阿克蘇取烏什捲和闐陣無不克城
無不下回民數萬皆仰怖

天威泥首請降作兩軍進第三

兩軍進驅采入其阻如風之捲如雷之怒馬雲蹂原
旗火照岫彼有隴種其敢渴鬪庫車旣犁阿蘇旣鏟
烏什我疆和闐我版壺漿載道婦子迎野出爾湯火
錫爾福嘏斧鉞我威煥咻我澤藐爾荒服各宅爾宅
將軍兆惠等自和闐進勦逆酋至葉爾羌賊悉

黨萬餘抗戰我師以四百餘人渡河奮擊斬
獲無算賊酋復駭遁我師築堡黑水蓄銳進
勦作戰黑水第四

戰黑水酋兇獍以牙曰恃其衆憑狡窟阻遐四百壯
士如熊如羆截流以渡摧而糜之神驅犛旄氣洞犀
札卷擗摧枯有面剝刮如山之頽則莫我敢軋狂渠
駭奔其膽郁縮天誅暫稽鬼魄就蹙惟師武力惟
皇聲靈執訊獲醜則莫我敢攖

逆回隔戈壁以抗我師

皇上睿算如神先期調集土馬策應當我師駐黑水
皇上預遣之兵迅速赴援又叅贊臣阿里衮驅後隊

馬夜至斫賊營賊大怖驚自相蹂躪挈其黨
以竄作摧戈壁第五

荒寒戈壁天豁豁

王師轉戰來幽遐彼兇當道盤修蛇主客異勢希齟齬
齟飛騰土馬嚴無譁夜斫賊寨相要遮雷轟霆割黑

月加賊乃大讐如童哇不煩我刃來搜爬互相蹈藉
爲蟲沙螳臂之斧敢當車誓將一掃殲其家

王師嘽嘽威無涯

葉爾羌喀什噶爾二城爲逆回巢穴其伯克開
門以降我師入撫定之作收二城第六

收二城二城平以軌髻首鑠耳合掌跪焚香夾道頌
天子將軍揚旗入其里前驅駐節後安壘野有薺麥
困有粟有鹿麋麋牛狔狔士餐蒲桃馬苜蓿因敵爲

糧氣壯逐我泉我貝我裳服不疑爾居事耕穀永歸
天朝作臣僕

逆酋既離巢駭遁叅贊臣明瑞邀之於霍斯庫

魯克副將軍臣富德再截之於阿爾楚爾返

戈投旆者數萬人逆酋益孤蹙僅攜眷屬遁
入拔達山境作游魂窮第七

游魂窮失巢咿呦走渴疲

王師奮桓桓詰誅索其魁徼劄而擣虛遮要相夾馳

風鶴匝地動雲羅
轟天乖

國討在罪人非盡窮寇
追彼黨自離散泣涕面目割
望旌乞活命厥角四野摧元兇益孤蹙喪其貝與輜
哇哇子與婦束之竄荒陲荒陲亦

天土疇敢庇爾迷卽將膏齊斧翼鼓示六師

將軍兆惠等追逆回至拔達山汗素爾坦沙懷
德畏力掎角殺賊斬逆酋首函獻軍門遣使
奉表籍地內附願爲臣僕作戮天狼第八

戮天狼拔達山酋坦沙居其間將軍整戈檄如飛宣
揚

天子神聖威援旗請奮導旌麾巨刃摩天首惡夷函
其頭顱跪獻師非勤遠畧相屠糜神人怒切同殛之
使臣齎表恭於辭籍疆奉責朝

玉墀惟明順逆應

帝期安爾蕃衛職爾司

回部旣平邊陲永靖自關門以西拓地二萬餘

里計用兵以來不越五年仰見

皇上睿算神機膚功迅奏超越萬禩作回之平第九
回之平版宇章拓月蝟包金方回之平土氣作瀚海
鐔天山鏢回之平軍興饒萬箱穀百牽牢回之平五
年速未缺斯未遺鏃回之平我武揚旄魚魚旗煌煌
回之平

天討威傲者刑順者懷回之平

廟謨神衷獨斷志必伸回之平

王心寧北幽崖南朱垠

皇上以回部平定日逢長至

躬祀

園壇申繼述之忱於

陵

廟告吉

慈寧茂典酬庸首自元戎迄於士卒咸蒙

寵賚寰宇臣民悉被

恩澤作樂凱旋第十

樂凱旋壯

皇圖景風扇慶雲敷登二成五惟

聖謨我

皇謙冲美弗居告成

天

祖祀事孔明宣捷

慈宮受釐集慶錫我元戎繡紱蔥珩錫我虎賁錦繡

綬章薄海內外

闔惠滂洋

紫宸端拱敕幾安康偃武修文守以賢良耘耔以時

土物蕃昌

臣

作饒歌永樂

昇平